

Оиша розияллоху анҳонинг қанотли отлари



09:20 / 17.10.2021 4706

Бу расмни кўрар эканман, ушбу ҳадис ёдимга келди. Расмдаги учар от эмас, аммо расмни кўрганимда шу ҳадис эсимга келгани учун расмни ҳадис остига жойладим.

Оиша розияллоху анҳодан ривоят қилинади:

«Мен Набий соллаллоху алайҳи васалламнинг ҳузурларида қўғирчоқ ўйнар эдим. Дугоналарим келишар ва Расулуллоҳ соллаллоху алайҳи васалламдан тортиниб туришар эди. Расулуллоҳ соллаллоху алайҳи васаллам уларни мен томон йўллаб қўяр эдилар. Сўнг улар мен билан ўйнашар эди».

Бухорий ва Муслим ривоят қилишган.

Бошқа ривоятда:

«Расулуллоҳ соллаллоҳу алайҳи васаллам Табук ёки Хайбар урушидан қайтиб келдилар. Унинг токчасида парда бор эди. Шамол турди ва парданинг бир тарафини кўтариб, Оишанинг ўйинчоқ қизларини очди. Шунда у зот: «Бу нима, эй Оиша?» дедилар. «Қизларим», дедим. Уларнинг орасида қуроқдан қилинган икки қанотли отни кўрдилар ва: «Уларнинг орасида кўраётганим мана бу нарса нима?» дедилар. «От», дедим. «Унинг устидаги мана бу нарса нима?» дедилар. «Иккита қанот», дедим. «Отнинг иккита қаноти бўладими?» дедилар. «Сулаймоннинг қанотли отлари бўлгани ҳақида эшитмаганмисиз?» дедим. Шунда у зот кулдилар ва мен ҳатто озиқ тишларини кўрдим», дейилган.

Абу Довуд ривоят қилган.

Қаранг, Пайғамбаримиз соллаллоҳу алайҳи васаллам онамизнинг ҳолатларига қандай риоя қиляптилар, инobatга оляптилар.

Онамиз розияллоҳу анҳонинг дугоналарини хижолатли вазиятдан чиқаришга уринганлар.

Севикли Ҳабибимиз соллаллоҳу алайҳи васаллам одатда табассум қилардилар. Тишлари кўринадиган даражадаги кулгу жуда нодир ҳолатларда бўлган. Бу ҳадисдаги воқеада Ҳабибимиз соллаллоҳу алайҳи васаллам жуфту ҳалолларининг гапларига тишлари кўринадиган даражада кулганлар.

Бу ҳадисда жуфтнинг кўнглини кўтариш, у билан гаплашиш, кулишиш, унинг ҳолатини, ёшини, нозиклигини ҳисобга олиш, шунга яраша муомала қилиш борасида набавий таълим бор.

«Сулаймоннинг қанотли отлари бўлгани ҳақида эшитмаганмисиз?» деган гапларидан Оиша розияллоҳу анҳонинг Пайғамбаримиз соллаллоҳу алайҳи васалламнинг ҳузурларида қадрлари, эркаликлари қанчалик эканини билиб олсак бўлади.

Бўлмаса, Онамиз розияллоҳу анҳо билган нарсани Пайғамбаримиз соллаллоҳу алайҳи васаллам билмасмидилар?!

Хўш, Сулаймон алайҳиссаломнинг отлари борасида Қуръони Каримда нималар дейилган?

Аллоҳ таоло Қуръони Каримда: **«Эсла, бир оқшом унга гижинглаб турган учқур отлар кўрсатилди»** деб марҳамат қилган. Бу оятда

Роббимиз Сулаймон алайҳиссаломга кўрганда кўзни қувонтирадиган, тез
чопадиган отларни кўрсатилганини баён қилган.

Отни томоша қилар эканман, Аллоҳ таолонинг Мусаввирлигига қойил
қолдим.

Аллоҳ таоло ҳаммамизни Ўзининг ҳидоятидан айирмасин ва хотимамизни
чиройли қилсин!

Нозимжон Ҳошимжон тайёрлади